

Katerisimaartarnernut, ininut kikkunnit tamanit iserfigineqarsinnaasunut assartuutinullu killilersuigallarnerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 12 a aamma 12 b, aamma § 29, imm. 2 malillugit aalajangersarneqarpoq:

Atuuffiata killilernerqarnera

§ 1. §§ 2 aamma 4 katersuunnernut naalakkersuinikkut allatulluunniit isummersornissamik siunertalinnut atuutinngillat.

Imm. 2. Nalunaarummi § 5 napparsimavinnut, nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik akuerisaallutik ingerlatani ingerlatsisunut atorfeqartitsiffiusunullu atuutinngilaq.

Katerisimaartarnerit il.il. pillugit killilersuigallarnerit

§ 2. Illup iluani silamilu aaqqissuussanik, nalliuttorsiornernik, sammisaqartitsinerinik assigisaanilluunniit ingerlataqarniarnermi aaqqissuussanut, nalliuttorsiornernut, sammisaqartitsinerinut assigisaanulluunniit peqataaniartut sumiiffinniit assigiinngitsunit angalanissaat naatsorsuutigineqarpat ilimagineqarpalluunniit aaqqissuussaq ingerlanneqaqqusaanngilaq, taamaattorli imm. 2 aamma 3 takukkit.

Stk. 2. Aaqqissuussanut, nalliuttorsiornernut, sammisaqartitsinerinut assigisaanullu peqataanissamut nalunaarfigisariaqartunut atatillugu inuit kommuninit allaneersut aaqqissuussamut, nalliuttorsiornermut, sammisaqartitsinerinut assigisaanulluunniit peqataanissamut nalunaarsinnaannginnissaat aaqqissuussisup qulakkiissavaa. Oqaaseqatigiit siulleq naammassineqarpat aaqqissuussat, nalliuttorsiornerit, sammisasaqartitsineq assigisaaluunniit pisinnaapput. §§ 3 aamma 4 atuupputtaaq.

Imm. 3. Inuinnaat namminneq aaqqissuussaat, soorlu kuisitsinerit, inuuissiornerit, apersortitsinerit, soraarummeernerit, katinernerit ilisinerillu imm. 1-imi ilaanngillat. Taamaattorli inuinnaat namminneq aaqqissuussaat § 3, imm. 1-imi aamma § 4, imm. 1-imi ilaapput.

§ 3. Illup iluani aaqqissuussat, nalliuttorsiornerit, sammisaqartitsinerit assigisaallu § 2-mi ilaanngitsut amerlanerpaamik 100-nik peqataasoqaqqusaapput, § 5-imillu malinnissallutik.

Imm. 2. Aaqqissuussisup inuit kommuninit allaneersut aaqqissuussamut, nalliuttorsiornermut, sammisaqartitsinermit assigisaanulluunniit peqataanissaannut toqqaannartumik kajumissaassanngilai.

§ 4. Silami aaqqissuussat, nalliuttorsiornerit, sammisaqartitsinerit assigisaallu § 2-mi ilaanngitsut amerlanerpaamik 250-inik peqataasoqaqqusaapput.

Imm. 2. Aaqqissuussisup inuit kommuninit allaneersut aaqqissuussamut, nalliuttorsiornermut, sammisaqartitsinermit assigisaanulluunniit peqataanissaannut toqqaannartumik kajumissaassanngilai.

Ininut kikkunnilluunniit iserfigineqarsinnaasunut piumasaqaatit

§ 5. Inuussutissarsiummik ingerlatallit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Inuit ininut qatserisartoqarfinni oqartussaasunik akuerineqarsimasunut isersinnaatitaasut amerlanerpaaffissaasa affaannaat akuerineqarsinnaapput.
- 2) Init ajornanngippat imatut pequsersorsimassapput tuniluunnissaq minnerpaaffianiitinneqassalluni, tassunga ilaalluni pisisut pulaartullu imminnut qanillinnginnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 4) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerreqassaaq.
- 5) Pisisunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 6) Nerisassanik poortorneqarsimanngitsunik tuniniaanermi sulisut aqqateqassapput.

§ 6. Inuussutissarsiummik ingerlatalik politiit naliliinerat malillugu § 5-imik unioqqutitsisimappat, inuussutissarsiummillu ingerlatalik § 5-imik malinninnissaa ilimagineqanngippat, inimi piffissami aalajangersimasumi tamanut matoqqatitsinissamik politiit peqqusisinnaapput.

Assartuutitut piumasaqaatit

§ 7. Assartuutit issiaffiusinnaasut sinnerlugit ilaasoqaqqusaanngillat. Oqaaseqatigiinni siullermi taaneqartup naammassinninnissaa assartuutip piginnittuata akisussaaffigaa.

Pineqaatissiissuteqartarnerit

§ 8. Aaqqissuisut §§ 2-4-nik unioqqutitsisut pinerluttulerinermik inatsit naapertorlugu pineqaatissinneqarsinnaapput.

Imm. 2. Inummot §§ 5 aamma 7-imik, unioqqutitsisumut imaluunniit § 6 malillugu peqqusinermik malinnikkumanngitsumut Pinerluttulerinermik Inatsit naapertorlugu pineqaatissiisoqarsinnaavoq.

Imm. 3. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq ikaarsaariarnermut malittarisassat aamma atuunneranut piffissaliussaq

§ 10. Nalunaarut ulloq 20. juni 2020 atuutilissaaq. Massuma peqatigisaanik Katerisimaartarnernut, ininut kikkunnit tamanit iserfigineqarsinnaasunut assartuutinullu killilersuigallarnert pillugit Namminersorlutik Oqartussat nalunaarutaat nr. 19, 16. juni 2020-meersoq atorunnaarsinneqassaaq.

Imm. 2. Nalunaarut malillugu killilersuinerit, inerteqquteqartitsinerit, peqqusinerit il.il. 1. august 2020 tikillugu atuutissapput.

Imm. 3. Inuit kommuninit allaneersut aaqqissuussanut, nalliuttorsiornermut, sammisaqartitsinerit assigisaanulluunniit peqataanissaminut nalunaarsinnaannginnissaat peqataasinnaannginnissaallu aaqqissuisut nalunaarutip atuutilerneraniit § 2 imm. 2 naapertorlugu akisussaaffigissavaat. Nalunaarut una atuutilinnginnerani inuit aaqqissuussanut, nalliuttorsiornermut, sammisaqartitsinerit assigisaanulluunniit peqataanissaminut nalunaarsimasut pisussanut taakkununga peqataasinnaatitaapput.

Imm. 4. Aaqqissuussisoq toqqaannartumik kajumissaarinerannut inerteqqut, §§ 3 aamma 4 takukkit, nalunaarut uuma atuutilernerata kingorna kajumissaarinerit atuuppoq.

Namminersorlutik Oqartussat, ulloq 19. juni 2020

Anna Wangenheim

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

